



**Uummasuutillit tunisassiornikkut, ingerlatsinikkut malitsigisaanillu uummasuutit pissarsissutaanerat annertusarniarlugu pissutsit atugaat pillugit pitsaangorsaanaissaq pillugu apeqquteqaat aallaavigalugu oqallinnissamik siunnersuut.**

(Inatsisartunut Ilaasortaq Suka K. Frederiksen, Siumut)

**Siullermeerneqarnera**

Inatsisartunut ilaasortaq Suka K. Frederiksen Siumut, oqallinnissamik siunnersuuteqarpoq, uummasuutillit tunisassiornikkullu pissarsissutaanerat annertusarniarlugu oqaasissagullu matumuuna saqqummiutissavagut Partii Naleqqaminngaaniit.

Nunatsinni imminut pilersornerunissarput sutigut tamatigut annertusartuartaqartoq siunnersuuteqartullu saqqummiussaa isumaqatigilluinnarparput.

Pingaartumik neqissaqarniarnikkut naatitsinikkullu periarfissat pitsaangorsartuarnissaat aammalu annertusarneqarnissaat pissusissamisoorpoq, taamatullu ineriartortitseqqinnissami sutigut tamatigut sapinngisamik aporfissaqarpallaanngitsumik periarfissarsiussisariaqarpugut.

Nunalerinermi inuussutissarsiorderup aningaasatigut imminut napatinnissaa aammalu inuussutissarsiuteqartunik iluanaarutaalluni ingerlanissaa pingaartillugu aqutissiuttariaqarpoq.

Ullutsinni ingerlatsinermut tunngasunik aammalu inatsisinik atuutsinneqartunik naleqqussarnissaq pinngitsoorneqarsinnaajunnaariartuinnarpoq. Tamannalu aallartinneqarsimasoq Naalakkersuisut oqariartutaat iluarisimaarparput.

Nunatat uummasuutininik neriniarfiusinnaasut sumiffiit ilaanni ajornarsiartortut oqallissaarisup tikkuarpai, soorunami taamatut ingerlasoqalersimappat ilungersunartumut killittoqassaaq uummasuutininut uumassuteqartunullu, arlaatigullu aqqissuusseqqittoqanngippat uummasuutininut inuussutissarsiuteqartunullu ilungersunarsiartuinnassaaq, ilaatigullu uummasuuteqarnerup

inuussutissarsiuteqarnerullu imminut napatissinnaanera killeqartorujussuannorsinnaalluni, sumiiffillu ilaanni imminut akilersinnaanera nalorninarsilluinnarsinnaalluni tamannalu pinngitsoortinniartariaqarpoq.

Pissutsit tamakku ilungersunartutut taakkartorneqartut pitsaanerulissappata taava pinngitsoorneqarsinnaanngilaq neriniartitsiviit annertusaaffigineqarnissaat minnerunngitsumillu aamma narsaasiornikkut uumasunut nerukkaatissanik amerlanerusunik pissarsiniarnermi sumiiffinni narsaasiornikkut periarfissalinni annertusaanissat aningaasaliinissallu pinngitsorneqarsinnaanngillat. Qinersisoqarnissaalu sioqqullugu nunalerinerup siuarsarneqarnissaanut 15 million koruunit ikkunneqaraluartut sooq peerneqarsimanersut ilanngullugu paaserusupparput.

Tamakkulu aamma annertusarneqassappata taava aamma narsaasiornikkut naatitsiniarnermilu atortut maskinat atorneqartartut aamma malinnaasittariaqarput, tassami nerukkaatissanik amerlanerusunik pissarsisoqassappat narsaasiernerit annertusartariaqarput, kiisalu naatitanik imminut pilersornerulissagutta aamma naatitsiviusinnaasut annertusarneqartariaqarmata, tamakkulu aamma atortulersuutitigut malinnaasinneqartariaqarput suliat kingunilimmik naammassineqassappata.

Aammalu nunalerineq uumassuteqarnerlu pitsaasumik ineriartortinneqassappata nersutaatit amerlisarneqassappata taava saneqqunneqarsinnaanngitsumik aqqusineqarnikkut aqqqissuusisoqartariaqarpoq, kiisalu aamma ulluinnarni silaannakkut attaveqaatit radio, internet telefonillu savaateqarfiit akornanni pitsanngorsartariaqarlutik.

Savaateqarnikkut, nersussuaateqarnikkut, puulukiuteqarnikkut allanillu uumasuuteqarnikkut annertusarnissaat aallunneqarnerusariaqalerput, tassami ukiut tamaasa neqit annertoorujussuit, kukkukuullu timmissallu allat ikigisassaanngitsut avataaniit eqqussuuppagut, tamannalu aamma allanngortinniartariaqalerparput, nunami imminut napatinnerulissappata suulluunniit periarfissat atorluanngisagut atorluartariaqaleratsigit.

Tassami aningaasat maani kaaviaartinneqaratik avammut neqinik pisiniartarnitsinni annissuinnarpagut, uffalu maani neqissaqarnikkut nammineq annertusaagutta aamma uumasuutilinnut aningaasarsiornikkut iluaqutaasumik aningaasat maani pinngortissinnaasagut amerlanerujussuanngortissinnaagaluarlugit.

Nersussuaateqartut Narsami nersualaagassaapput, nutaamik periarfissamik eqqarsarlutik aallartitsinerat tapersorsorlugulu sulii periarfissaqarnerulernissaat sulissutigisariaqarparput, qularnanngivippormi siunissami inuussutissarsiutinut pingaarnernut ilanngussinnaanerit, taamaattumik annertussasoqarnissaanut naalakkersuinikkut ikiuuttariaqarpugut.

Nersussuit neqaat saanikorsuulu , pulukillu neqaat pamiuulu, kukkukuuqqat allalu timmissat nioqqutigineqartut amerlasuut eqqussuuppugut, inerikkat pisiniarfinni tuniniariannaat aggorikkat, uffalu aamma maani periarfissarsiussinnaagaluarlugit maani ilivitsunngorlugit tikiseriarlugit aggorlugit suliffissanik pilersitsiviusinnaagaluartut suliffissaaleqisummi amerlaqimmata.

Aammalu nersutaateqarnikkut annertusaanissat pissappata, nersussuaateqarnerit puulukiuteqarnerit timmiaateqarnerillu

Taava uumasuutit inaat annertusarneqartariaqarput, nutaaliernerit aningaasalersugassaassapput, kiisalu aamma pioreersut aserfallassimasut pitsanngorsagassaassallutik, taamaattumik suliassat pilersaarusiornissaat aningaasalersuinissallu malinnaasinnissaat aamma sillimaffigisariaqarlutik.

Kiisalu uumasuuteqarnikkut ineriartorneq aammalu ingerlallualissappat, taava aamma uumasunik toqoragassanik assartuinikkut eqaalisaasoqartariaqarpoq, tassami uumasuuteqarfiit annertusillutik siammasinnerulissappata aamma assartuinerit annertusissammata, taamaattumik najukkami uumasunik toqoraaveeqqat ilanngullugit eqqarsaatigisariaqartut soorunami tamanna pissutsit atugassarititaasut ajornartinnngippassuk.

Ulluinnarni ingerlatsineq pitsaanerulissappat, aammalu akikinnerusumik savaateqarfiit ingerlalissappata, nukimmik akikitsumik kiassarnermut qaammaqqusersuinernullu tunngasunik ineriartortitsisoqartariaqarpoq. Erngup anorip seqernullu nukinganit ineriartortitsinnissaq savaateqarfinni aningaasalersuiffiginissaa aamma aallartilluartariaqarpoq, periarfissaqareeraluarpoq, tamannalu savaatillit ilaanni atorluarneqarpoq kisiannili ineriartorneq iluatsissappat nukissiornermik suliffeqarfinnik ingerlatallit siunnersortigalugillu ineriartortitsinnissaq aallartilluartariaqarpoq.

Aammalu orsussanik pilersuinermi ukiumullu atugassanik toqqortaqaarnermi ullutsinnut nappartat naleqqukkunnaarput, savaateqarfinni aamma orsussanik uningatitsinermi tank-inik peqqumaasiveqalernissaq ilanngullugu eqqarsaatigisariaqarpoq, taamaalliluni aamma orsussamik pajunneqarnermi piffissaq sivikinnersoq atorneqarsinnaalissaaq, isumannaanerusumillu ukiumut orsussat atugassat paarineqarsinnaanngussallutik.

Kiisalu aamma nerukkaatissanik tikisitsisarnermi nersutaatilinnut massakut atugassaritinneqartut pitsaanerpaajungitsut oqaatigisariaqarparput. Nunatsinni imarpik ikaarlugu kisermaassilluta assartuineramik ingerlatsinerput pissutigalugu akisoorujussuarmik ilaatigull uumasuutillit akiliisinnaanerat innarlerujussuarlugu kinguneqartarmat.

Taamaattumik assartuinermi nerukkaatissanik naggorissaatissanik maskinanillu immikkut assartuisinnaanerata eqqarsaatigisariaqarparput, immikkut nersutaatillit naatitsisartullu namminneq ataatsimoorlutik nerukkaatissanik maskinanik atortussanillu nunatsinnut assartuisinnaanngorlugit, taamaaliornikkut aamma imminut akilersinnaanerusumik ingerlalersinnaanerata qaninnerulissagaluarmat.

Narsaasiornikkummi siuarsaanissami sukkasuumik nerukkaatissat amigaatigineqartut pissarsiarineqarsinnaanerata ukiuni arlalinni anguniarnissaat ingerlaqqaartariaqassammata, taamaattumik nerukkaatissanik assartuisarnikkut immikkorluinnaq aqqisoqarnissaa kissaatiginarpoq.

Nersutaateqarnikkut neriniartitsivinnik ajornartorsioriarporneq pissutigalugu taava eqqarsartariaqarpugut ilumut kisimi periarfissaanersoq taamaallaat nunatta kujataani nersutaateqarsinnaaneq ingerlanneqarsinnaanersoq.

Assersuutigalugu Nuup kangerlussua piukkunnarluinnartoq sooq atorneqanngila? Aammalu taannaannaanngilaq, suli avannarpassinnerusoq aamma pikkunnarluinnartunik kangerluppasuaqarpoq uumasuuteqarfiusinnaasunik, nunalerinikkullu naatitsiffiusinnaasunik, namminnermi kajumissutsiminnik soqutiginnittut avannaani takussutissaqartitsimmata naatsiaanik naatitsillutik aamma misileraallutik periarfissaqartoq takutittarmassuk, qularnanngiviipooq nunalerinermik ilisimanittunik ilitsersorneqarunik aamma angusarissaalluarsinnaasut naatitsinnikkut imminut pilersornerunissamut annertusaaqataasinnaallutik.

Naalakkersuisut ESU-mut tunngasunik suliaqarlutik aallartinnerat isumalluarfigaarput, tassami nutaamik nersutaateqarnermut nunalerinermullu aallartitsinissamut soqutiginnittunut sapinngisamik aporfeqarpallaanngitsumik aallartitsinnaaneq aqqutissiuttariaqarmat.

Taamatut oqaaseqarluta oqallissaarummut soqutiginarumut Partii Naleqqamiit saqqummiussivugut.